



# ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ք. Երևան

01.07.2020թ.

## Ո Ր Ո Շ ՈՒ Մ

### ՀՀ գնումների հետ կապված բողոքներ քննող անձի թիվ ՍՑ-ՆԳ-2020/120

Հայաստանի Հանրապետության գնումների հետ կապված բողոքներ քննող անձը՝  
ի դեմս Գրիգոր Ներսիսյանի,

Մասնակցությամբ «Անգել» ՍՊԸ-ի ներկայացուցիչ՝  
Վ.Պապյանի (լիազորագիր տրված՝ 15.06.2020թ.)

ուսումնասիրելով Հայաստանի Հանրապետության ֆինանսների նախարարության  
09.06.2020թ. թիվ 26/26-1/8518-2020 գրությամբ «Անգել» ՍՊԸ-ին գնումների  
գործընթացին մասնակցելու իրավունք չունեցող մասնակիցների ցուցակում ներառելու  
նպատակով նախաձեռնված ընթացակարգով ներկայացված հիմքերը, պարզեցի  
հետևյալը.

#### **1. ՀՀ ֆինանսների նախարարության ներկայացրած փաստերը և պահանջը.**

ՀՀ ֆինանսների նախարարությունը, ՀՀ պաշտպանության նախարարության  
04.06.2020թ. թիվ ՊՆ/ՊՆ/02/1758-2020 գրության հիման վրա, 09.06.2020թ. թիվ  
26/26-1/8518-2020 գրությամբ նախաձեռնել է «Անգել» ՍՊԸ-ին (հետայսու նաև՝  
Ընկերություն) գնումների գործընթացին մասնակցելու իրավունք չունեցող  
մասնակիցների ցուցակում ներառելու ընթացակարգ:

## **2. «Անգել» ՍՊԸ-ի ներկայացրած փաստարկները և դիրքորոշումը.**

«Անգել» ՍՊԸ-ն 12.06.2020թ. ՀՀ գնումների հետ կապված բողոքներ քննող անձին ուղղված գրությամբ հայտնել է հետևյալը.

«Ուսումնասիրելով թիվ ՍՅ-ՆԳ-2020/120 ընթացակարգի նախաձեռնման համար հիմք հանդիսացած փաստաթղթերը, գտնում ենք, որ նախաձեռնումը հիմնազուրկ է, իսկ նախաձեռնված ընթացակարգը՝ ենթակա մերժման, հետևյալ պատճառներով՝

«Գնումների մասին» ՀՀ օրենքի (այսուհետ՝ Օրենք) 4-րդ հոդվածը սահմանում է՝ «Գնումների մասին Հայաստանի Հանրապետության օրենսդրությունը բաղկացած է Հայաստանի Հանրապետության քաղաքացիական օրենսգրքից, սույն օրենքից և իրավական այլ ակտերից»: Այլ ակտերից է ՀՀ կառավարության 04.05.2017թ. թիվ 526-Ն որոշմամբ հաստատված «Գնումների գործընթացի կազմակերպման» կարգը (այսուհետ՝ Կարգ), ուստի քննակվող հարցերը կուսումնասիրենք ՀՀ քաղաքացիական օրենսգրքի (այսուհետ՝ Օրենսգրք), Օրենքի և Կարգի պահանջների լույսի ներքո:

Օրենսգրքի 417-րդ հոդվածի համաձայն՝ պարտապանը պարտավորությունը չկատարելու և (կամ) անպատշաճ կատարելու համար պատասխանատու է մեղքի առկայության դեպքում: Պարտապանը ճանաչվում է անմեղ, եթե ապացուցվում է, որ ինքը պարտավորությունը պատշաճ կատարելու համար ձեռնարկել է իրենից կախված բոլոր միջոցները:

ՀՀ ՊՆ կարիքների համար անհրաժեշտ ապրանքների ձեռք բերման նպատակով հայտարարված ՀՀ ՊՆ ՆՏԱԴ-ԳՀԱՊՁԲ-20-7/24 ծածկագրով ընթացակարգին 04.02.2020թ. մանակցության հայտ է ներկայացրել նաև «Անգել» ՍՊԸ-ն: Ընթացակարգի շրջանակում անցկացված մրցույթի արդյունքում «Անգել» ՍՊԸ-ն ճանաչվել է որպես 6-13-րդ չափաբաժինների մասով ընտրված մասնակից: 14.05.2020թ. նշված ծածկագրով ընթացակարգի գնահատող հանձնաժողովի կողմից «Անգել» ՍՊԸ-ին է ուղարկվել կնքվելիք պայմանագրի նախագիծը՝ ծանոթանալու, ստուգելու և օրենսդրությամբ սահմանված ժամկետներում և կարգով որակավորման և պայմանագրի ապահովման բանկային երաշխիքները ներկայացնելու համար: Հիշյալ պայմանագրի նախնական օրինակը ստանալուն պես՝ 2020թ. մայիսի 14-ին «Անգել» ՍՊԸ-ն դիմել է ՍՊԸ-ն սպասարկող «Հայբիզնեսբանկ» ՓԲԸ-ին, որպեսզի օրենքով սահմանված 10 աշխատանքային օրվա ընթացքում ստանանք որակավորման և

պայմանագրի ապահովման բանկային երաշխիքներ: Նշված երաշխիքների ստացման հարցը եղել է մեր ուշադրության կենտրոնում, հաճախակի զանգահարել ենք «Հայբիզնեսբանկ» ՓԲԸ, խնդրելով հնարավորինս արագացնելու բանկային երաշխիքների տրամադրումը, սակայն բանկը պատճառաբանելով կորոնավիրուսի հետևանքով աշխատողների բացակայությունը և խիստ ծանրաբեռնվածությունը, հայտնում էին, որ չեն հասցնում բանկի ներքին նորմատիվ ակտերով սահմանված ընթացակարգերը իրականացնել և ժամանակին մեզ երաշխիքներ տրամադրել: Մեր բազմաթիվ խնդրանքներից հետո միայն «Հայբիզնեսբանկ» ՓԲԸ-ն 27.05.2020թ. մեզ տրամադրեց տեղեկանքներ այն մասին, որ ԳՀԱՊՁԲ-20-7/24-4 ծածկագրով պայմանագրի և որակավորման ապահովման բանկային երաշխիքները բանկի կողմից հաստատված են և կթողարկվեն բանկի ներքին նորմատիվ ակտերով սահմանված ընթացակարգերի հիման վրա համապատասխան պայմանագրերի կնքումից հետո: Սակայն սահմանված 10 աշխատանքային օրերի ընթացքում «Հայբիզնեսբանկ» ՓԲԸ-ն չի հասցրել մեզ տրամադրել նշված բանկային երաշխիքները, ուստի այդ պատճառով ի վիճակի չենք եղել ՊՆ ՆՏԱԴ հանձնաժողովին ներկայացնելու պայմանագիրը և պայմանագրի ու որակավորման բանկային երաշխիքները: Այդ պատճառով գնահատող հանձնաժողովը մեր հայտը մերժել է, որի մասին, առանց մեզ տեղեկացնելու, մեր վերաբերյալ անհրաժեշտ փաստաթղթերը ներկայացրել է ՀՀ Ֆինանսների նախարարություն՝ «Անգել» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու գործընթաց նախաձեռնելու նպատակով:

Օրենքի 6-րդ հոդվածի 1-ին մասի 6-րդ ենթակետի համաձայն՝ գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է Պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց

գ. հայտերը բացելուց հետո հրաժարվել է գնման գործընթացի հետագա մասնակցությունից:

Կարգի 45-րդ կետի համաձայն Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող 5 աշխատանքային օրվա ընթացքում Պատվիրատուն տվյալ մասնակցի տվյալները համապատասխան հիմքերով գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում նախաձեռնում է տվյալ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

Ինչպես նշվեց, համաձայն ՀՀ քաղաքացիական օրենսգրքի 417-րդ հոդվածի Պարտապանը ճանաչվում է անմեղ, եթե ապացուցում է, որ ինքը պարտավորությունը պատշաճ կատարելու համար ձեռնարկել է իրենից կախված բոլոր միջոցները:

Նշված իրավանորմերի վերլուծությունից պետք է փաստել, որ օրենսդիրը մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու համար նախատեսել է սպառիչ պայմաններ, որոնք են՝ պայմանագրով նախատեսված կամ գնման գործընթացի շրջանակում ստանձնած պարտավորությունների խախտումը, որը հանգեցրել է Պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, որպես ընտրված մասնակից պայմանագիր կնքելուց հրաժարվել է և հայտերը բացելուց հետո գնման գործընթացին հետագա մասնակցությունից հրաժարվելը: Այսինքն, մասնակցի կողմից պարտավորությունների խախտման դեպքում է նոր միայն առկա նրան գնումների գործընթացին մասնակցելու իրացունք չունեցող մասնակիցների ցուցակում ներառելու հիմքեր, այսինքն՝ նշված գործընթացը պարտավորությունների խախտման հետևանք է և դրա համար նախատեսված պատասխանատվության միջոց: Իսկ եթե առկա է պարտավորության խախտման համար մեղքի բացակայության հիմքեր, ապա վերանում են նաև հետևանքները՝ պատասխանատվության միջոցները, իսկ սույն դեպքում՝ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու հիմքեր:

Ինչպես պարզվում է հիշյալ ծածկագրով ընթացակարգի փաստաթղթերից, «Անգել» ՍՊԸ-ն բարեխիղճ, օրենքի տառին համապատասխան և շահագրգիռ կերպով

մասնակցել է գնման ընթացակարգին, ճանաչվել ընթացակարգի 6-13-րդ չափաբաժինների մասով ընտրված մասնակից, անհապաղ ձեռնամուխ է եղել պայմանագրի կնքման, պայմանագրի ու որակավորման ապահովումների ձեռքբերմանը և ներկայացմանը, սակայն իրենից անկախ պատճառներով, այն է՝

«Հայբիզնեսբանկ» ՓԲԸ-ի կողմից պայմանագրի և որակավորման ապահովման բանկային երաշխիքները ուշացնելու պատճառով հայտնվել է հայտը մերժված լինելու կարգավիճակում, ընդ որում «Անգել» ՍՊԸ-ն իրավական որևէ լծակ չունի «Հայբիզնեսբանկ» ՓԲԸ-ի կողմից բանկային երաշխիքների տրամադրումը արագացնելու հարցում:

«Հայբիզնեսբանկ» ՓԲԸ-ի կողմից բանկային երաշխիքները ուշացնելու պատճառների մասին մենք բարեխիղճ կերպով 02.06.2020թ. թիվ 01/06 գրությամբ հայտնել ենք ՊՆ ՆՏԱԴ պետին, խնդրելով ևս 2 աշխատանքային օր տրամադրել բանկային երաշխիքները ներկայացնելու համար, կից ուղարկելով բանկի տրամադրած տեղեկանքները երաշխիքների ուշացման վերաբերյալ: ՊՆ ՆՏԱԴ ղեկավարությունը որևէ արձագանք չի տվել մեր հիշյալ գրությանը»:

Ամփոփելով վերոգրյալը՝ Ընկերությունը Գնումների հետ կապված բողոքներ քննող անձին խնդրել է «Անգել» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված սույն ընթացակարգը մերժել:

«Անգել» ՍՊԸ-ն, պատշաճ ծանուցված լինելով ՍՑ-ՆԳ-2020/120 ընթացակարգի շրջանակներում 15.06.2020թ. ժամը 10:50-ին հրավիրված նիստի վերաբերյալ, ապահովել է իր ներկայացուցչի մասնակցությունը, ով պնդել է վերոհիշյալ գրությամբ ներկայացված դիրքորոշումը:

### **3. ՀՀ պաշտպանության նախարարության կողմից ներկայացված փաստարկները և դիրքորոշումը.**

ՀՀ պաշտպանության նախարարությունը (հետայսու նաև՝ Պատվիրատու) ՀՀ ֆինանսների նախարարությանն ուղղված 04.06.2020թ. թիվ ՊՆ/ՊՆ/02/1758-2020 գրությամբ հայտնել է հետևյալը.

«ՀՀ ՊՆ ՆՏԱԴ-ԳՀԱՊՁԲ-20-7/24» ծածկագրով գնանշման հարցման ընթացակարգի 6-13-րդ չափաբաժինների մասով 30.04.2020թ. գնահատող

հանձնաժողովի որոշմամբ ընտրված մասնակից է ճանաչվել «Անգել» ՍՊԸ-ն (այսուհետ՝ Մասնակից): 14.05.2020թ. սահմանված կարգով համակարգի (armeps.am) միջոցով պայմանագիր կնքելու մասին ծանուցումը և պայմանագրի նախագիծը ուղարկվել է Մասնակցին: Սակայն վերջինս ընթացակարգի հրավերով սահմանված կարգով և ժամկետում չի ստորագրել պայմանագիրը և պատվիրատուին ներկայացրել պայմանագրի ու որակավորման ապահովումները, ուստի, հիմք ընդունելով «Գնումների մասին» ՀՀ օրենքի 36-րդ հոդվածի 3-րդ մասի պահանջները, «Անգել» ՍՊԸ-ի հայտը մերժվել է»:

Ամփոփելով վերոգրյալը՝ Պատվիրատուն հայտնել է, որ ներկայացնում է Ընկերության վերաբերյալ անհրաժեշտ փաստաթղթերը՝ գնման գործընթացին մասնակցելու իրավունք չունեցող մասնակիցների ցուցակում ներառելու գործընթաց նախաձեռնելու նպատակով:

Պատվիրատուն, պատշաճ ծանուցված լինելով ՍՑ-ՆԳ-2020/120 ընթացակարգի շրջանակներում 15.06.2020թ. ժամը 10:50-ին հրավիրված նիստերի վերաբերյալ, չի ապահովել իր ներկայացուցչի մասնակցությունը:

#### **4. ՍՑ-ՆԳ-2020/120 ընթացակարգի քննության համար էական նշանակություն ունեցող փաստերը.**

ՍՑ-ՆԳ-2020/120 ընթացակարգի քննության համար էական նշանակություն ունեն հետևյալ փաստերը.

1. ՀՀ պաշտպանության նախարարության կողմից կազմակերպվել է ՀՀ ՊՆ ՆՏԱԴ-ԳՀԱՊՁԲ-20-7/24 ծածկագրով գնանշման հարցման ընթացակարգ (հետայսու նաև՝ Ընթացակարգ), որին մասնակցելու նպատակով հայտ է ներկայացրել «Անգել» ՍՊԸ-ն:

2. 30.04.2020թ. Ընթացակարգի գնահատող հանձնաժողովի որոշմամբ՝ հավելված N 2-ի համաձայն՝ 6-13-րդ չափաբաժինների մասով, ընտրված մասնակից է ճանաչվել «Անգել» ՍՊԸ-ն:

3. Ընթացակարգի գնահատող հանձնաժողովի 02.06.2020թ. նիստի թիվ 4 արձանագրությամբ արձանագրվել է, որ «Անգել» ՍՊԸ-ն գնումների մասին ՀՀ օրենսդրությամբ սահմանված ժամկետում չի ստորագրել պայմանագիրը և Պատվիրատուին ներկայացրել պայմանագրի ու որակավորման ապահովումները,

ուստի գնահատող հանձնաժողովի որոշմամբ Օրենքի 36-րդ հոդվածի 3-րդ մասի համաձայն՝ «Անգել» ՍՊԸ-ի հայտը մերժվել է:

**5. ՀՀ գնումների հետ կապված բողոքներ քննող անձի հիմնավորումները և եզրահանգումը.**

ՀՀ գնումների հետ կապված բողոքներ քննող անձ՝ Գրիգոր Ներսիսյանս, ուսումնասիրելով ՀՀ ֆինանսների նախարարության 09.06.2020թ. թիվ 26/26-1/8518-2020 գրությունը, ՀՀ պաշտպանության նախարարության 04.06.2020թ. թիվ ՊՆ/ՊՆ/02/1758-2020 գրությունը՝ կից փաստաթղթերով, «Անգել» ՍՊԸ-ի 12.06.2020թ. գրությունը և կից փաստաթղթերը, հայտնում եմ հետևյալը.

«Գնումների մասին» ՀՀ օրենքի (հետայսու նաև Օրենք) 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

**բ. որպես ընտրված մասնակից հրաժարվել է պայմանագիր կնքելուց,**

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին

սույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Օրենքի 35-րդ հոդվածի 1-ին մասի համաձայն՝ պայմանագրի ապահովում ներկայացնելու պահանջի հիման վրա այն ստանալու օրվանից 10 աշխատանքային օրվա ընթացքում ընտրված մասնակիցը պարտավոր է ներկայացնել պայմանագրի ապահովում: Ընտրված մասնակցի հետ պայմանագիր կնքվում է, եթե վերջինս ներկայացնում է պայմանագրի ապահովում:

Օրենքի 36-րդ հոդվածի համաձայն՝

1. Պայմանագիր կնքվում է գնահատող հանձնաժողովի որոշման հիման վրա՝ պատվիրատուի կողմից:

2. Սույն օրենքի 10-րդ հոդվածով սահմանված անգործության ժամկետը լրանալուն հաջորդող չորս աշխատանքային օրվա ընթացքում պատվիրատուն ծանուցում է ընտրված մասնակցին՝ ներկայացնելով պայմանագիր կնքելու առաջարկը և պայմանագրի նախագիծը: Ընդ որում, պայմանագիրը կարող է կնքվել ոչ շուտ, քան սույն օրենքի 10-րդ հոդվածով սահմանված անգործության ժամկետը լրանալու օրվան հաջորդող երկրորդ աշխատանքային օրը:

**3. Եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին ներկայացնում պայմանագրի ապահովումը, ապա նա զրկվում է պայմանագիրը ստորագրելու հրավունքից:** Պայմանագրով կանխավճար նախատեսվելու դեպքում սույն կետով նախատեսված ժամկետը սահմանվում է 15 աշխատանքային օր:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (հետայսու նաև՝ Կարգ) 32-րդ կետի 1-ին ենթակետի գ) պարբերության համաձայն՝ հրավերով նախատեսվում է նաև, որ՝ մասնակիցը հայտով ներկայացնում է՝ իր կողմից հաստատված հավաստում՝ ընտրված մասնակից ճանաչվելու դեպքում, օրենքի 35-րդ հոդվածով սահմանված ժամկետում, ներկայացրած գնային առաջարկի չափով որակավորման ապահովում ներկայացնելու պարտավորության մասին:

Կարգի 32-րդ կետի 12-րդ և 13-րդ ենթակետերի համաձայն՝



12) ընտրված մասնակցին պայմանագիր կնքելու առաջարկը և կնքվելիք պայմանագրի նախագիծը հանձնաժողովի քարտուղարը տրամադրում է էլեկտրոնային եղանակով: Ապրանքների գնման դեպքում պայմանագրի նախագծում ներառվում է ընտրված մասնակցի կողմից հայտով ներկայացված ապրանքի ամբողջական նկարագիրը:

13) ընտրված մասնակցի կողմից հաստատված պայմանագրի նախագիծը պատվիրատուին ներկայացվում է գրավոր, և դա ներկայացնելու գրությունը հաշվառվում է պատվիրատուի փաստաթղթաշրջանառության համակարգում: Պատվիրատուի ղեկավարի կողմից պայմանագրի նախագիծը հաստատվում է այդ իրավասության առաջացմանը հաջորդող երկու աշխատանքային օրվա ընթացքում:

Նույն կետի 19-րդ ենթակետի համաձայն՝ եթե մասնակցի՝ հրավերով նախատեսված գնումներին մասնակցելու իրավունք ունենալու մասին հավաստումը որակվում է որպես իրականությանը չհամապատասխանող, կամ մասնակիցը հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը կամ **ընտրված մասնակիցը չի ներկայացնում որակավորման ապահովումը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում**:

ՀՀ պաշտպանության նախարարության կողմից կազմակերպվել է ՀՀ ՊՆ ՆՏԱԴ-ԳՀԱՊԶԲ-20-7/24 ծածկագրով գնանշման հարցման ընթացակարգ, որին մասնակցելու նպատակով հայտ է ներկայացրել «Անգել» ՍՊԸ-ն:

Ընթացակարգի գնահատող հանձնաժողովի նիստի թիվ 3 արձանագրության հավելված N 2-ի համաձայն՝ 6-13-րդ չափաբաժինների մասով, ընտրված մասնակից է ճանաչվել «Անգել» ՍՊԸ-ն:

Ընթացակարգի գնահատող հանձնաժողովի 02.06.2020թ. նիստի թիվ 4 արձանագրությամբ արձանագրվել է, որ «Անգել» ՍՊԸ-ն գնումների մասին ՀՀ օրենսդրությամբ սահմանված ժամկետում չի ստորագրել պայմանագիրը և Պատվիրատուին ներկայացրել պայմանագրի ու որակավորման ապահովումները, ուստի գնահատող հանձնաժողովի որոշմամբ Օրենքի 36-րդ հոդվածի 3-րդ մասի համաձայն՝ «Անգել» ՍՊԸ-ի հայտը մերժվել է:

Այսպիսով՝ Ընթացակարգի հրավերի 9.3-րդ, 9.4-րդ և 9.5-րդ ենթակետերի համաձայն՝

9.3 Ընտրված մասնակցին պայմանագիր կնքելու առաջարկը և կնքվելիք պայմանագրի նախագիծը հանձնաժողովի քարտուղարը տրամադրում է էլեկտրոնային եղանակով: Ընդ որում պայմանագրում ներառվում է ընտրված մասնակցի կողմից հայտով ներկայացված ապրանքի ամբողջական նկարագիրը:

9.4 Պայմանագիր կնքելու մասին պատվիրատուի ծանուցումն ընտրված մասնակցին ուղարկելու օրը հանձնաժողովի քարտուղարը համակարգի միջոցով ընտրված մասնակցի էլեկտրոնային փոստին ուղարկում է ծանուցում՝ պայմանագիր կնքելու առաջարկը տրամադրված լինելու մասին:

**9.5 *Եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում չի ստորագրում պայմանագիրը և պատվիրատուին ներկայացնում որակավորման և պայմանագրի ապահովումը, ապա նա զրկվում է պայմանագիրը ստորագրելու իրավունքից:***

Ընդ որում ընտրված մասնակցի կողմից հաստատված պայմանագրի նախագիծը պատվիրատուին ներկայացվում է գրավոր և դրա ներկայացման գրությունը հաշվառվում է պատվիրատուի փաստաթղթաշրջանառության համակարգում: Պատվիրատուի ղեկավարի կողմից պայմանագրի նախագիծը հաստատվում է այդ իրավասության առաջացմանը հաջորդող երկու աշխատանքային օրվա ընթացքում և հաստատմանը հաջորդող աշխատանքային օրը ուղեկցող գրությամբ տրամադրվում է ընտրված մասնակցին:

«Գնումների մասին» ՀՀ օրենքի 36-րդ հոդվածի 2-րդ մասը սահմանում է, որ Օրենքի 10-րդ հոդվածով սահմանված անգործության ժամկետը լրանալուն հաջորդող չորս աշխատանքային օրվա ընթացքում պատվիրատուն ծանուցում է ընտրված մասնակցին՝ ներկայացնելով պայմանագիր կնքելու առաջարկը և պայմանագրի նախագիծը:

Նույն հոդվածի 3-րդ մասի համաձայն՝ **եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին ներկայացնում պայմանագրի ապահովումը, ապա նա զրկվում է պայմանագիրն ստորագրելու իրավունքից:**

Կարգի 32-րդ կետի 1-ին ենթակետի գ) պարբերության համաձայն՝ հրավերով նախատեսվում է նաև, որ՝ մասնակիցը հայտով ներկայացնում է՝ իր կողմից հաստատված հավաստում՝ ընտրված մասնակից ճանաչվելու դեպքում, օրենքի 35-րդ հոդվածով սահմանված ժամկետում, ներկայացրած գնային առաջարկի չափով որակավորման ապահովում ներկայացնելու պարտավորության մասին:

Այսպիսով՝ գնումների մասին ՀՀ օրենսդրությամբ սահմանվում է հստակ ժամկետ պայմանագիրը ստորագրելու, ինչպես նաև պայմանագրի և որակավորման ապահովումները ներկայացնելու համար, որը չպահպանելու դեպքում մասնակիցը զրկվում է պայմանագիրը կնքելու իրավունքից:

«Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «բ» ենթակետի համաձայն՝ մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե որպես ընտրված մասնակից հրաժարվել է պայմանագիր կնքելուց:

Այսպիսով՝ ուսումնասիրելով ՀՀ պաշտպանության նախարարության կողմից սույն Ընթացակարգի շրջանակներում ներկայացված հիմքերը, ինչպես նաև Ընկերության կողմից ներկայացված դիրքորոշումը՝ կից փաստաթղթերով, դրանք համադրելով գործում առկա ապացույցների հետ՝ գտնում եմ, որ «Անգել» ՍՊԸ-ն հրաժարվել է ՀՀ ՊՆ ՆՏԱԴ-ԳՀԱՊՁԲ-20-7/24 ծածկագրով պայմանագիրը կնքելուց և թույլ է տվել «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «բ» ենթակետի խախտում, քանի որ Ընկերությունը, 14.05.2020թ. ծանուցվելով կնքվելիք պայմանագրի վերաբերյալ, սահմանված ժամկետում չի ստորագրել պայմանագիրը, որի հետևանքով զրկվել է պայմանագիրը կնքելու իրավունքից:

Ինչ վերաբերում է Ընկերության կողմից սույն ընթացակարգի շրջանակում դիրքորոշմամբ ներկայացված այն պնդմանը, որ «Հայբիզնեսբանկ» ՓԲԸ-ի կողմից պայմանագրի և որակավորման ապահովման բանկային երաշխիքները ուշացնելու պատճառով հայտնվել է հայտը մերժված լինելու կարգավիճակում և «Անգել» ՍՊԸ-ն իրավական որևէ լծակ չունի «Հայբիզնեսբանկ» ՓԲԸ-ի կողմից բանկային երաշխիքների տրամադրումը արագացնելու հարցում: Ընդ որում՝ «Հայբիզնեսբանկ» ՓԲԸ-ի կողմից բանկային երաշխիքները ուշացնելու պատճառների մասին բարեխիղճ կերպով 02.06.2020թ. թիվ 01/06 գրությամբ հայտնել է ՊՆ ՆՏԱԴ պետին, խնդրելով ևս 2 աշխատանքային օր տրամադրել բանկային երաշխիքները ներկայացնելու

համար՝ կից ուղարկելով բանկի տրամադրած տեղեկանքները երաշխիքների ուշացման վերաբերյալ, սակայն ՊՆ ՆՏԱԴ ղեկավարությունը որևէ արձագանք չի տվել հիշյալ գրությանը, ապա սույն մասով հարկ եմ համարում արձանագրել հետևյալը.

Ընկերությունը սույն ընթացակարգի շրջանակում Գնումների հետ կապված բողոքներ քննող անձին է ներկայացրել Ընկերության կողմից «Հայբիզնեսբանկ» ՓԲԸ-ին ուղղված դիմում-հայտերը, ՀՀ պաշտպանության նախարարությանն ուղղված 02.06.2020թ. թիվ 01/06 գրությունը, ինչպես նաև «Հայբիզնեսբանկ» ՓԲԸ-ի 27.05.2020թ. թիվ 3083-02 տեղեկանքը, որտեղ նշվում է, որ «Անգել» ՍՊԸ-ի և ՀՀ պաշտպանության նախարարության միջև կնքված ԳՀԱՊՁԲ-20-7/24-4 ծածկագրով պայմանագրի ապահովման բանկային երաշխիքը բանկի կողմից հաստատված է և կթողարկվի բանկի ներքին նորմատիվ ակտերով սահմանված ընթացակարգերի հիման վրա համապատասխան պայմանագրերի կնքումից հետո:

Միաժամանակ Ընկերությունը ներկայացրել է «Անգել» ՍՊԸ-ի կողմից «Հայբիզնեսբանկ» ՓԲԸ-ին ուղղված 11.06.2020թ. թիվ Ա-001 գրությունը, որտեղ մասնավորապես նշվել է, որ բանկի կողմից անհասկանալի պատճառներով «Անգել» ՍՊԸ-ին չեն տրամադրվել ՀՀ ՊՆ ՆՏԱԴ-ԳՀԱՊՁԲ-20-7/24 պայմանագրով նախատեսված տասներկու միլիոն դրամ, ՀՀ ՊՆ ՆՏԱԴ-ԳՀԱՊՁԲ-20-7/30-4 պայմանագրով տասներեք միլիոն դրամ երաշխիքները:

Այսպիսով՝ վերը նշված գրությունից ակնհայտ է դառնում, որ դեռևս 11.06.2020 թվականի դրությամբ «Հայբիզնեսբանկ» ՓԲԸ-ի կողմից Ընկերությանը չեն տրամադրվել բանկային երաշխիքներ, մինչդեռ արձանագրում եմ, որ «Անգել» ՍՊԸ-ի հայտը Ընթացակարգի գնահատող հանձնաժողովի կողմից նիստի թիվ 4 արձանագրության համաձայն՝ մերժվել է 02.06.2020թ., քանի որ վերջինս Օրենքի 36-րդ հոդվածի 3-րդ մասով սահմանված ժամկետում չի ստորագրել պայմանագիրը և Պատվիրատուին ներկայացրել պայմանագրի ու որակավորման ապահովումները և Ընկերության այն պնդումն, որ երկու օր ուշացմամբ Ընկերության կողմից կտրամադրվեին համապատասխան բանկային երաշխիքները հիմնավոր չեն, ինչը փաստվում է նաև 11.06.2020թ. թիվ Ա-001 գրությամբ:

Ընդ որում՝ արձանագրում եմ, որ ՍՑ-ՆԳ-2020/120 ընթացակարգով որոշումը կայացնելու օրվա դրությամբ Ընկերության կողմից չի ներկայացվել որևէ ապացույց, որով կհիմնավորվեր Ընկերության կողմից Գնումների հետ կապված բողոքներ քննող

անձին 12.06.2020թ. ներկայացված դիրքորոշումը:

Այսպիսով՝ Կարգի 32-րդ կետի 19-րդ ենթակետի համաձայն՝ եթե մասնակցի՝ հրավերով նախատեսված գնումներին մասնակցելու իրավունք ունենալու մասին հավաստումը որակվում է որպես իրականությանը չհամապատասխանող, կամ մասնակիցը հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը կամ **ընտրված մասնակիցը չի ներկայացնում որակավորման ապահովումը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում:**

Օրենքի 6-րդ հոդվածի 2-րդ մասի համաձայն՝ անձը գնումների գործընթացին մասնակցելու իրավունք չունեցող մասնակիցների ցուցակում ընդգրկվում է երկու տարի ժամկետով:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

## Ո Ր Ո Շ Ե Ց Ի

Հայաստանի Հանրապետության ֆինանսների նախարարության 09.06.2020թ. թիվ 26/26-1/8518-2020 գրությամբ «Անգել» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը բավարարել և «Անգել» ՍՊԸ-ին ընդգրկել գնումների գործընթացին մասնակցելու իրավունք չունեցող մասնակիցների ցուցակում՝ ՀՀ գնումների հետ կապված բողոքներ քննող անձի որոշումն ուժի մեջ մտնելու օրվանից հաշված երկու տարի ժամկետով:

ՀՀ գնումների հետ կապված բողոքներ քննող անձի որոշումն իրավապարտադիր է և ուժի մեջ է մտնում տեղեկագրում հրապարակվելու հաջորդ օրը:

ՀՀ գնումների հետ կապված բողոքներ քննող անձի որոշումը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

Գնումների հետ կապված  
բողոքներ քննող անձ՝



ԳՐԻԳՈՐ ՆԵՐՍԻՍՅԱՆ